



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL**

Komunikadu Imprensa

23 Feveiru 2023

**JSMP realiza treinamentu ba estrutura suku no estudante husi Universidade da Paz
kona-ba prevensaun tráfiku umanu**

**Partisipante sira agradese tanba konsidera informasaun sira ne'e foun no tulun
tebes sira hodi bele hases-an husi krime sira ho tipu tráfiku umanu**

Iha loron 13 Feveiru 2023, Programa Monitorizasaun ba Sistema Judisiáriu (JSMP) realiza ona treinamentu kona-ba prevensaun tráfiku umanu ba estudante Universidade da Paz Faculdade Siensia Sosiais no Armonia ne'ebé ho total partisipante nain 20. Antes ne'e iha 06 Feveiru 2023, JSMP mós realiza ona treinamentu ho tópiu hanesan ba estrutura suku no comunidade husi Suku Bobometo, Postu Administrativu Oesilo, Rejiaun Autonomia Espesial Ambeno Oekusi (RAEOA) ho total partisipante nain 22 no iha 06 Feveiru 2023, realiza ona treinamentu ba estrutura no comunidade iha Suku Tapo-Memo, Postu Administrativu Maliana Vila, Munisípiu Bobonaro ho total partisipante hamutuk nain 21. Iha treinamentu ne'e, JSMP ko'alia liu kona-ba definisaun tráfiku umanu, objetivu ho meus husi tráfiku umanu inklui oinsá bele lori kazu tráfiku umanu ba iha justisa formál.

“Treinamentu ne'e ho objetivu atu ajuda estrutura suku bele hatene kona-ba lalaok husi krime tráfiku umanu ne'e rasik nune'e bainhira kazu sira ne'e akontese oinsá fó tulun ba sira nia comunidade sira inklui hodi lori prosesu ne'e ba iha justisa formál no iha sesaun ida ne'e JSMP kontinua foku ba suku sira ne'ebé iha kedan liña fronteira ne'ebé iha risku tebes ba krime sira ho tipu ba tráfiku umanu inklui ba estudante sira ne'ebé dala barak sai alvu ba autór sira ba krime refere, buat ne'ebé importante iha sesaun ida ne'e JSMP deskobre katak depoisde simu tiha informasaun hirak ne'e, partisipante sira iha suku rua ne'e deklarata katak iha pasadu akontese ona krime sira ne'e no agora dadaun mós akontese hela aktu sira balun ne'ebé halai ba tipu tráfiku umanu maibé sira la hatene katak aktu sira ne'e iha ikus bele halai ba krime sira ho tipu tráfiku umanu ” dehan Sra. Ana Paula Marçal, Diretora Ezekutiva JSMP.

Xefi Suku Tapo Memo - Joaquim B. Dos Santos iha nia intervensaun agradese ba JSMP tanba bele hili sira nia suku hodi mai fahe informasaun kona-ba prevensaun tráfiku umanu tanba konsidera importante tebes tanba iha antes sira nunca hetan informasaun hanesan ne'e, nune'e ho treinamentu ne'e sira nia comunidade bele hadook-an husi krime refere. Xefi Suku ne'e hatutan mós katak sira nia comunidade dala ruma infrenta hela situaun

Rua Beco Lakateu, Aldeia Manu fuik, Suku Kolmera, Administrativu Vera Cruz

Munisípiu Dili, Timor-Leste

P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste

ne'e maibe tanba sira rasik la hatene tipu husi krime refere entaun sira bele hanoin katak ida ne'e la'os krime no sira bele monu lalais ba trafikante sira ne'e nia atetude.

Parte seluk Xefi Suku Bobometo hateten sira kontente tanba JSMP bele mai to'o sira nia fatin ne'ebé iha kedan liña fronteira hodi fahe informasaun refere ba iha sira nia comunidade tanba antes ne'e akontese duni ona krime tráfico umanu iha sira nia suku maibe comunidade barak mak la hatene loloos krime ida ne'e mak oinsá no saida mak sira tenki halo bainhira situasaun sira ne'e akontese ba sira. Tuir xefi suku ne'e katak maiória comunidade suku Bobometo iha família ne'ebé hela iha Kefa, Indonézia ne'ebé sira presiza deit minutu 20 liu hakat husi liña fronteira no dala barak akontese iha comunidade sira halo viazen ilegal ba malu, nune'e tuir nia depoisde simu informasaun kona-ba prevensaun tráfico umanu konsidera possibilidade boot duni bele akontese hahalok sira ne'e tanba durante ne'e iha duni tantu ema individu no kompañia balun tama sai sira nia suku hodi buka joven sira ba serbisu hanesan traballador doméstika nomós ba iha serbisu iha fabrika.

Entretantu durante treinamentu, partisipante sira tantu husi suku rua ne'e nomós estudante husi UNPAZ hotu sente informasaun ne'ebé JSMP fó hanesan buat ne'ebé foun ezemplu sira iha inisiu lahatene kona-ba ema ne'ebé fasilita ema seluk hodi hetan lukru ba aktu prostituisaun ne'e konsidera autor ba iha krime explorasaun seksuál tanba tuir sira katak ema ne'ebé tuir loos tenki kriminaliza mak ema ne'ebé halo aktu prostituisaun inklui labele mós kriminaliza ema ne'ebé fasilita bainhira iha konsentimentu ho parte sira ne'ebé halo aktu prostituisaun.

Partisipante sira mós foin hatene kona-ba iha aktu tráfico umanu inklui hahalok sira kona-ba bosok ba fasilita serbisu ho saláriu ne'ebé bo'ot tantu iha rai laran nomós ba rai liur maibe ikus serbisu hirak ne'e la eziste no ba halo serbisu seluk ne'ebé refere ba prostituisaun, serbisu forsada, eskravaudaun no ka bele mós hasai tiha ema nia orgaun.

Iha sesaun ida ne'e, estrutura suku nomós estudante sira husu ba JSMP atu bele fahe mós informasaun refere ba comunidade sira iha suku seluk nomós ba estudante sira iha fakuldade sira seluk tanba informasaun hirak ne'e importante tebes hodi tulun comunidade no joven sira bele hases-an husi krime hirak ne'e.

Treinamentu ne'e rasik realiza tanba hetan apoiu fundu husi The Asia Foundation.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl

Rua Beco Lakateu, Aldeia Manu fuik, Suku Kolmera, Administrativu Vera Cruz

Munisípiu Dili, Timor-Leste

P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste